

Ho giûgà cunt'al Bambin

Al pôssè povar da tûti i Bambin,
là d'imparlû, senza nissûna,
int'una povra cûna
da legn, pugià
sû 'na grampà
da paia: biut, senza gnanca un camisin.
G'avrà frèt,
pensavi...
e 'm tiravi sû al gulèt;
g'avrà pagûra,
tremavi...
La cesa l'è tantu scûra.
'Na sogn granda ma spungiva i oeucc,
ma stavi fèrma, citu, in ginoeucc:
al miracul spetavi d'la Santa Ura.
Da culp l'organ al tasiva...
mi tignivi al fià...
al mund s'era fermà...
Al mè coeur sul al bativa.

Sèt (a) stèli s'viscavan
sèt (a) stèli chi brilavan
tût in gir a la tèsta del Bambin,
parevan tûti d'or i rissulin!
Sunavan i campani, sunavan,
duvevan tûti savé ch'l'era nassû
da tûti al pôssè povar: Gesù.

G'avrà frèt,
tremavi..
e 'm tiravi sû al gulèt,
biut, senza gnanca un camisin,
pensavi...
duman 't porti un scussalin
e pan e sùcar e i bij par giûgà;
dàm, Bambin, la tò manina,
t'la riscaldi, provi a bufà.
La mama am tirava in scossa
e cun la tèsta pugià
sû la spala calda e mursina
m'indurmentavi...
Insèma al Bambin giûgavi
che sèt (a) stèli lûsenti
g'aveva par curuna,
ma povar l'era, senza nissûna;
dumà g'aveva al mè scussalin
e calda e rosa l'era la manina
che mi stringevi
e dasi, dasi gh'bufavi in scima.

In brascia am piava al mè papà
par purtam ca':
l'andava pian, pianin,
par mia disvigiam,
par pudé lassam
giûgà cunt'al Bambin.